



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-1053

13/11/2020

ქ. თბილისი

გარდაბნის მუნიციპალიტეტში, სოფ. თელეთის ტერიტორიაზე შპს „უნივერსალის“ ცხოველთა სასაკლავოს მოწყობასა და ექსპლუატაციაზე სკრინინგის გადაწყვეტილების შესახებ

შპს „უნივერსალის“ მიერ გზშ-ის ჩატარების საჭიროების დადგენის მიზნით საქართველოს გაერთიანებული სახელმწიფოს და სოფლის მეურნეობის მინისტროში წარმოდგენილია გარდაბნის მუნიციპალიტეტში, სოფ. თელეთის ტერიტორიაზე ცხოველთა სასაკლავოს მოწყობისა და ექსპლუატაციის სკრინინგის განცხადება.

წარმოდგენილი დოკუმენტაციის თანახმად, ცხოველთა სასაკლავოსთვის საჭირო ინფრასტრუქტურის მოწყობა დაგეგმილია გარდაბნის მუნიციპალიტეტში, სოფ. თელეთის ტერიტორიაზე, შპს „უნივერსალის“ საკუთრებაში არსებულ მიწის ნაკვეთებზე (ს/კ 81.03.14.023; 81.03.14.024; 81.03.14.25). სკრინინგის განცხადების მიხედვით, ტერიტორია ცენტრალური გზიდან დაშორებულია 2 კმ-ით, ხოლო უახლოესი დასახლებული პუნქტიდან 1400 მეტრით. თუმცა, წარმოდგენილი მონაცემების ელექტრონული გადამოწმების შედეგად დგინდება რომ საპროექტო ტერიტორიიდან უახლოესი საცხოვრებელი სახლის საკადასტრო საზღვრამდე მანძილი შეადგენს დაახლოებით 1025 მეტრს (სოფ. წალასყური), ხოლო 715 მეტრში მდებარეობს თელეთის მეფრინველეობის ფერმა. ტერიტორიას უშუალოდ ესაზღვრება სასოფლო-სამეურნეო დანიშნულების მიწის ნაკვეთები.

საპროექტო მიწის ნაკვეთებზე დაგეგმილია ცხოველთა დასაკლავად გათვალისწინებული (ტექნოლოგიური ხაზის) შენობის, ოფისის, გამწმენდი ნაგებობის და დაცვის ჯიხურის განთავსება. ტექნოლოგიური ხაზის შენობაში გათვალისწინებულია ცხოველების თავისა და ჩლიქების დამუშავების, დამუშავებული პროდუქტის, ტყავის დამუშავების, თეთრი და წითელი შიგნეულის დამუშავების, განრბილვა-დაფასოების, სამაცივრე და მოსამწიფებელი სივრცეების მოწყობა. აღნიშნული შენობა ასევე მოიცავს საგარდერობე ოთახებს ქალებისა და მამაკაცებისთვის, ვეტერინარის ოთახებს, ღორის და რქოსანი ცხოველების სადგომებს, აღრიცხვის ფართს, ინვენტარის სარეცხ ოთახს, შესაფუთი მასალების ოთახს და ჩატვირთვის უბანს.

სკრინინგის განცხადების მიხედვით, ტერიტორიაზე შემოყვანილი ცხოველების განთავსება მოხდება სპეციალურ სადგომში, სადაც ცხოველი გაივლის ვეტერინარულ კონტროლს, რის შემდეგაც გადავა დასაკლავ ხაზში. აღნიშნულ ეტაპზე მოხდება ცხოველის დაკვლა, გასუფთავება, გამოშიგვნა. სხვადასხვა სივრცეებში გათვალისწინებულია ცხოველების თავის და ჩლიქების, ტყავის, თეთრი და წითელი შიგნეულის დამუშავება. ასევე დამოუკიდებელი ოთახი იქნება გამოყოფილი ხორცის განრბილვა-დაფასოებისთვის, საიდანაც პროდუქცია გადავა დაფასოებული

პროდუქციის მაცივარში. სარელიზაციოდ გატანა მოხდება სამაცივრე ოთახიდან ჩატვირთვის ხაზის გავლით.

ცხოველებისთვის განკუთვნილი სასაკლავო იმუშავებს წელიწადში 300 დღე, 8 საათიანი სამუშაო გრაფიკით. საწარმოში ჯამურად დასაქმებული იქნება დაახლოებით 20 – 25 ადამიანი. სასაკლავო ტერიტორიაზე მოხდება დღეში დაახლოებით 60-70 სული ღორის დაკვლა, რაც თვეში შეადგენს 2000 სულ ღორს. თითოეული ღორის სავარაუდო წონა იქნება 100-120 კილოგრამი. განცხადების მიხედვით, საწარმოში მოხდება როგორც სხვადასხვა ქვეყნებიდან (რუსეთი, დანია, უკრაინა), ასევე ადგილობრივი ბაზრის ან/და ადგილობრივი მოსახლეობის მიერ შემოყვანილი ცხოველების დაკვლა.

საწარმოს ტერიტორიაზე სასმელი წყლის შემოტანა მოხდება ბუტილიზირებული სახით, რაც შეეხება ტექნიკურ წყალს, კომპანის დაგეგმილი აქვს საწარმოს ტერიტორიაზე ჭაბურღილის მოწყობა. საპროექტო ტერიტორიაზე წარმოქმნილი სამეურნეო-საყოფაცხოვრებო ჩამდინარე წყლები შეგროვდება საასენიზაციო ორმოში, რომელიც დაიცვლება პერიოდულად შესაბამისი სამსახურის მიერ. ტერიტორიაზე წარმოქმნილი საწარმოო წყლის გაწმენდა მოხდება ბიოლოგიურ გამწმენდ ნაგებობაში, საიდანაც გაწმენდილი წყალი გადავა სპეციალურად მოწყობილ მობეტონებულ ორმოში. განცხადების მიხედვით, გამწმენდ ნაგებობაში დაჭერილი ცხიმები შემდგომი მართვის მიზნით გადაეცემა შესაბამისი ნებართვის მქონე ორგანიზაციას. საპროექტო ტერიტორიაზე სანიაღვრე წყლების დაბინძურების რისკი დაბალია, ვინაიდან საწარმოო ციკლი მიმდინარეობს დახურულ შენობაში.

განცხადების მიხედვით, შესრულებული იქნა სასაკლავო განთავსებისთვის განკუთვნილი საპროექტო ტერიტორიის საინჟინრო-გეოლოგიური კვლევები, რის შემდეგაც მიღებულ იქნა შემდეგი დასკვნები და რეკომენდაციები: საინჟინრო-გეოლოგიური სირთულის მიხედვით, საკვლევი რაიონი მიეკუთვნება I (მარტივი) კატეგორიას, სამშენებლო ნაკვეთი და მისი მიმდებარე ტერიტორია საინჟინრო თვალსაზრისით არის მდგრადი და არ საჭიროებს სხვადასხვა სახის საინჟინრო ჩარევას.

წარმოდგენილი დოკუმენტაციის თანახმად, დაგეგმილი საქმიანობა არ ითვალისწინებს მცენარეულ საფარზე ზემოქმედებას. საპროექტო ტერიტორია არ ხვდება დაცული ტერიტორიების, კულტურული მემკვიდრეობის ძეგლების და ტყით მჭიდროდ დაფარული ტერიტორიების სიახლოვეს, სადაც გაბატონებულია საქართველოს „წითელი ნუსხით“ დაცული ხე-მცენარეები. განცხადების მიხედვით, ტერიტორიაზე არ არის წარმოდგენილი ნიადაგის ნაყოფიერი ფენა, შესაბამისად, მასზე ზემოქმედება მოსალოდნელი არ არის.

ტერიტორიაზე ხმაურწარმოქმნელი დანადგარები არ იმუშავებს. ხოლო რაც შეეხება სატრანსპორტო საშუალებების მოძრაობით გამოწვეულ ხმაურს და ზემოქმედებას ატმოსფერულ ჰაერზე, განცხადების მიხედვით უახლოეს მოსახლესთან დაშორების მანძილის გათვალისწინებით აღნიშნული ზემოქმედება იქნება დაბალი მნიშვნელობის. ამასთან, საპროექტო ტერიტორიასთან მისასვლელად გამოიყენება არსებული გრუნტის გზა, რომელიც არ მდებარეობს დასახლებული პუნქტის სიახლოვეს.

წარმოდგენილი დოკუმენტაციის მიხედვით, სასაკლავო ფუნქციონირებისას წარმოქმნილი საყოფაცხოვრებო ნარჩენები განთავსდება შესაბამის კონტეინერებში და დაგროვების შესაბამისად, მათი გატანა მოხდება კომუნალური სამსახურის მიერ. საპროექტო ობიექტის სპეციფიკიდან გამომდინარე მოსალოდნელია ცხოველური ნარჩენების წარმოქმნა, მათ შორისაა ჩლიქები და ბეწვი. აღნიშნული ნარჩენები დროებით

დასაწყობდება საწარმოს ტერიტორიაზე მოწყობილ სპეციალურ დახურულ სივრცეში და პერიოდულად გადაეცემა შესაბამისი ნებართვის მქონე ორგანიზაციას.

განცხადებაში არ არის წარმოდგენილი ინფორმაცია საწარმოს მოწყობის ეტაპზე მოსალოდნელი სამშენებლო ნარჩენების და მათი მართვის შესახებ. ასევე საქმიანობის სპეციფიკიდან და მასშტაბიდან გამომდინარე დამატებით შესწავლას და შეფასებას საჭიროებს ტერიტორიაზე წარმოქმნილი ნარჩენების მართვის საკითხები, მათ შორის მნიშვნელოვანი საკითხებია ნარჩენების მოსალოდნელი რაოდენობა და ნარჩენების დამუშავებისთვის გამოყენებული მეთოდები. არ არის წარმოდგენილი ინფორმაცია საწარმოში წარმოქმნილი სისხლის შესახებ, რომელიც სავარაუდოდ ჩაშვებული იქნება გამწმენდ ნაგებობაში. პროექტით წარმოდგენილი ინფორმაცია გამწმენდი ნაგებობის შესახებ ასევე არ არის საკმარისი მისი ეფექტურობის შესაფასებლად. ამასთან, განცხადების მიხედვით, გამწმენდიდან წყალი გადადის მობეტონებულ ორმოში, თუმცა, არ არის მითითებული ორმოს ამოვსების შემდეგ როგორ მოხდება აღნიშნული წყლის მართვა. აღნიშნული ორმო ასევე საჭიროებს განხილვას სუნის კუთხით, რომელიც განცხადებაში შესწავლილი არ არის. სკრინინგის განცხადების მიხედვით, ცალკე სივრცეში მოხდება ცხოველების თავის და ჩლიქების დამუშავება, თუმცა, შემდეგ, ნარჩენების თავში ჩლიქები განხილულია საწარმოო ნარჩენად. აღნიშნული საკითხი ბუნდოვანია და საჭიროებს დაზუსტებას. ამასთან, განცხადების თანახმად, საწარმოო ტერიტორიაზე წარმოქმნილი ცხოველური ნარჩენები დროებით დასაწყობდება ტერიტორიაზე მოწყობილ სპეციალურ დახურულ სივრცეში, თუმცა, არ არის აღწერილი სათავსი და განთავსების პირობები. განცხადების მიხედვით, ტერიტორიაზე გავალისწინებულია რქოსანი ცხოველის სადგომის მოწყობა. აღნიშნული საკითხი ბუნდოვანია და განცხადებაში წარმოდგენილი არ არის ინფორმაცია იმის შესახებ გათვალისწინებულია თუ არა ღორებთან ერთად ტერიტორიაზე სხვა სახის საქონლის დაკვლა, მათი მოსალოდნელი რაოდენობა. ამასთან დასაზუსტებელია რა ვადით მოხდება ცხოველთა დაყოვნება სპეციალურ სადგომში.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და გარდაბნის მუნიციპალიტეტის მერიის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

სკრინინგის განცხადების მიხედვით დგინდება, რომ გარდაბნის მუნიციპალიტეტში, სოფ. თელეთის მიმდებარე ტერიტორიაზე ცხოველების სასაკლავოს მოწყობამ და ექსპლუატაციამ, საქმიანობის სპეციფიკის და მასშტაბის გათვალისწინებით, შესაძლოა გამოიწვიოს გარემოზე მნიშვნელოვანი ზემოქმედება.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსი“-ს მე-7 მუხლის მე-6 ნაწილის, ამავე კოდექსის II დანართის მე-7 პუნქტის 7,6 ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ გარდაბნის მუნიციპალიტეტში, სოფ. თელეთის ტერიტორიაზე შპს „უნივერსალის“ ცხოველთა სასაკლავოს მოწყობა და ექსპლუატაცია დაექვემდებაროს გარემოზე ზემოქმედების შეფასებას;
2. შპს „უნივერსალი“ ვალდებულია „გარემოსდაცვითი შეფასების კოდექსის“ მე-8 მუხლის შესაბამისად უზრუნველყოს სკოპინგის პროცედურის გავლა;

3. ბრძანება დაუყოვნებლივ გაეგზავნოს შპს „უნივერსალს“;
4. ბრძანება ძალაში შევიდეს შპს „უნივერსალის“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და გარდაბნის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი